

寶應縣志卷十二

人物志

列傳下

清

楊捷 王榜子孫 朱克簡弟克昌 喬萊

郭昂 成康保子準原大 孫 劉國黻

劉中柱 季愈 王式丹子懋姪懋訥

劉師恕 王懋竑喬崇修 朱澤灃子光進喬謹

陳大復 張肱 王希伊 劉世暮

王嵩高 劉台拱子源岷 朱彬 劉台斗弟台垣

寶應縣志 卷十二 目 一 人物志

劉彥矩 朱士彥 朱士達弟士廉子念祖

成誠全子觀宣 劉寶楠 成孺姚江 劉恭冕朱百度

王凱泰 朱士端從弟鼎 朱百遂 成肇慶

劉啓彤從弟啓襄

附南齊

王敬則

寶應縣志卷十二

人物志

列傳下

楊捷字元凱其先寶應人明代以軍功世襲指揮使隸義州從父國柱兄振俱死事已別有傳捷承餘烈束髮從軍旅卽以武略知名順治初授山西游擊破太行賊有功陞總兵官鎮九江尋討粵東賊克潮州累加左都督太子少保移鎮揚州改山東提督平東萊之亂福建海氛未靖再晉少保兼太子太保提督福建水陸軍務至則先攻定海以分賊勢隨合師從惠安搗賊老營克

之先是泉州陷於賊旣復制府欲屠之捷力阻得免以功加昭武將軍時賊尙屯漸山等處分十九寨捷先取諸島嶼建七營調集八槳各船示以欲渡狀賊受制不能分應遂破十九寨寇平以原銜管江南提督事給世襲三等哈哈番聖祖南巡捷迎謁御書丹誠二字額旌之卒贈少傅諡敏壯葬揚州子孫遂籍江都捷父國棟仍以原籍祀寶應鄉賢

道光志

王榜字爾賓垂髫時工舉子業趙令炯奇愛之每試輒第一順治丁亥成進士授德化知縣縣濱海小邑也環萬山中海寇數數犯境內榜受事數旬治戰守具甚備

鄰邑大田尤溪皆陷德化獨全以失懽大吏被論劾尋得白歸舟泊江上對月飲酒酒酣出犀玉飲器及銀鑿落羅案上滿引竟卽投於水凡投數十器無敢勸阻者既歸田里益縱酒自娛不治生產橐中金分給諸昆季會兵舸過寶邑邑無令兵索繈夫不得將譁榜出白金募夫民得不擾其任達疏財多類此子孫晉字亦退工詩有名於時

道光志

朱克簡字石崖號澹子順治四年進士授中書八年典試廣東時嶺南初入版圖鎮兵不戢孝廉多詣克簡泣言其情克簡怒責諸鎮稽查諸被掠者還之十二年考

授御史巡按八閩時山賊焚掠攻陷城池則請仙霞增兵禁沿海接濟築漳浦十邑之城撥游擊分防楓亭等處上防海八議在軍中數旬擒獲海賊輒立決其中有非盡爲賊者驗其髮不過五寸仍編爲民免誅戮者萬餘人至汀州聞海寇數萬環攻福州統汀鎮兵兼程進賊稍退尋偵知援兵無多復圍攻克簡與巡撫宜永貴並力戰克捷城得全至漳州左布政以軍餉匱乏詳請定遠將軍追徵十一十二兩年錢糧克簡力阻之至福清以閩安鎮爲要地設重兵守之連江羅源福清長樂分汎派兵爲指臂應至福甯多置屯兵爲城守至興化

楓亭驛嚴禁勒充夫役與太守張彥珩議賑捐俸以倡活者萬二千人至泉州以崇武獺戶爲泉之門戶安海大盈爲泉之藩籬分設汛兵與同安聯絡至邵武裁省夫役至延平知延船梢工多爲山賊線索令沿江府縣設循環簿稽查至建甯與諸生講明朱子聖學汀州延平建甯三郡山川相連賊踞險肆劫克簡與地方道府李元萃涂應泰等離其黨援搗其巢穴魏福賢敗亡黃素禾陳德容周立次第歸誠前後上疏如禁株連蠲鹽課陳驛因革帶辦等無不道民疾苦預爲保護又立六規二十四維八恤七情七革十三餘以及鹽政屯政諸

規條皆有裨實政云秩滿歸築環谿草堂奉二親徜徉其中年七十八卒著有巡閩奏議子約經俱別有傳克簡弟克昌字哲人康熙十六年歲貢仕安徽宿松縣訓導居心平恕制行端方教諸生尙文章氣誼以疾卒

道

喬萊字子靜號石林可聘子幼穎悟未成童應邑試邑令疑其幼立試七題始令之入歎曰喬公有後矣登康熙丁未進士除內閣中書舍人充壬子順天鄉試同考官以父老請歸養尋丁憂服除補原官己未試博學宏詞一等改授翰林院編修纂修明史粵西平補行鄉試

萊主考稱得士還充實錄纂修官以國書譯漢文獨能
曲暢本指語簡而事詳仁皇帝再試詞臣萊名第四間
日復試名第五上甚悅曰喬萊學問優長文章古雅命
充日講官知起居注升翰林院侍講轉侍讀時淮揚久
罹水患臺臣有請濬海口者上遣官行視還奏當如御
史言河臣冀董其役而上以命安徽按察使于公成龍
河臣失望乃別創一議奏請築隄束水使高自高郵歷
興化白駒場入海疏下九卿諸司會議萊聞之大驚會
上以役大費多召河臣與于公廷論之于公痛排前議
上命詢淮揚官京師者河臣使其客以厚利啗萊萊不

應乃集淮揚士夫於邸寓備言其害且曰今日之事當
以死爭之諸人皆稱善乃篝燈草議明日率劉給諫國
斌等上之時內閣九卿集左掖門以議示河臣河臣語
塞萊乃言曰此非不可已之工工以救民也今河臣請
帑二百七十八萬焚民廬掘民墓賣民田俾生者流離
死者暴露以云救民可乎以田言之凡三十頃五十頃
者富家也十頃五頃者中人產也值一開河地無立錐
矣其貧士貧民孤兒寡婦三十畝二十畝爲餬口具者
不將饑而死乎以房而言古人千金賣宅老嫗哭之哀
今下河一帶村落相望一旦拆毀男啼女哭之聲豈不

上千天和至於墳墓或棺槨既朽或子孫無人拋棄遷移亦何忍而爲此耶使河臣治上河有功黃淮之水合流於雲梯關入海則減水壩可以不設下河可以不治設減水壩者棄田以保隄也皇上目覩減水壩之爲害開海口所以救其病耳乃又設此奇謀上侵國帑下吞民田以飽無窮谿壑余不言生不可爲人死不可爲鬼矣是時萊持論慷慨激昂聲徹殿陛相國梁公清標宋公德宜家宰李公之芳少司寇張公可前皆曰江淮間可謂有人大司農科爾坤公執萊手曰公言是公本土人見之眞言之確我等何從知之河臣議乃寢而忌之

者衆遂中蜚語罷歸闢縱棹園讀易其中萊之建議也于公甚德之及出管河務恆以地方利弊相諮訪萊必直言無隱甲戌春有旨召入京居住人咸爲萊危萊坦然就道先是萊官京師嘗闢一峯草堂於宣武門西至是仍居焉鍵戶謝客讀易著書如故未半載得疾卒年五十三萊爲人明敏表裏洞達無城府友愛兄弟篤於故舊又疎於財急人之難如不及尤喜汲引才士至桑梓利病如築子嬰隄啓閉涵洞募派夫役等事尤侃侃言之鄉里多蒙其利卒之日朝野莫不悲之

道光志

郭昂字子抑康熙九年進士少孤貧母嘗索肉糜營錢

不得會入塾主家出肉糜大慟主家知之日致佳味以慰昂及貴輒厚報之初授山西孟縣知縣立程嬰公孫杵臼祠平反數大獄望吏議起復選山東齊河縣縣歲徵米麥上倉例用民解民苦之昂詳請官解審釋窩逃案內連坐百餘人陞廣東連州知州州瀕海依山數被盜賊會陳奉作亂昂白上官假兵二千駐大江灘上聲言勦賊實不動累月偵知奉謀士關浩乾者駐小寨於賊之右甄以他事與奉忤密招至敬禮之約爲內應遂擒戮奉等三十餘人脅從者省釋并散還被虜男女百餘人以疾致仕民爲建生祠年七十六卒

道光志

成康保字安若一字商衡康熙十八年進士授中書二十六年分校禮闈後典試山西出爲台州府同知台故瀕海奸徒出沒爲海道梗康保下車卽與營員約添造巡船賈舶益集台衛屯田悉坐黃太兩邑磽瘠不可治間有願墾者又忱於衛弁需索康保懲衛弁某以法地日以治權海巡役歲有陋例爲操舟者病康保重懲之甯海有大役需金四百例責里民康保自任之龍顧山有八忠祠祀靖難革除死事諸臣祠久圯康保重新之并益以林葉兩公顏曰十忠又扶持緱成正學後裔題贈樂安鄭恕盧迴雙忠祠額並請於學使立其後爲奉

祀生仙居秋米撥解甯海營者歲三千石山路崎嶇每米一石費銀一兩康保力請改折又釋麗水盜案冤獄卒於官入祀名宦著有周易闡微四卷子三準申珥準字韋齋號北鑰康熙己卯順天副榜國子監教習廣東龍川縣知縣性剛正以除強扶弱爲己任奸蠹不敢犯後以事被劾準慨然曰不如柔不吐剛以清白詒子孫循吾職而已復奚悔申珥別入文苑傳孫原大字于用一字聲夏乾隆丁巳進士授福建閩清縣知縣未赴丁父艱服闋補四川南川縣改山東濟陽調魚臺三年清廉自守惠政決人肌髓以病告歸魚臺士民請於上官

復留三年歸里教授生徒與王典簿箴傳主壇坫論文

藝述淵源者迄今猶稱成王云

道光志

劉國黻字禹美號後齋康熙二十一年進士改庶吉士遷戶科給事中陞都給事疏言直隸各省起科則例有大地小地之殊最爲明辨見田賦門得旨下九卿詹事科道會議遷通政司參議歷督捕理事官考覈則例刊布內外凡逃人株連勒取州縣官職名待劾者弊盡除別由是督捕案牘闕稀朝廷乃裁其官而改國黻爲鴻臚卿國黻雖早達不懈於學有詩文集若干卷子師恕等別

有傳

道光志

劉中柱字砥澗號禹峯由廩貢生授臨淮縣教諭遷國子監學正歷擢兵部主事戶部郎中分督京倉有清望上賜詩曰求端從有術及物豈無因誠特眷也出守眞定府府舊轄三十二州縣守令羨餘過他郡中柱至議一切裁去上官止之曰君自可耳難爲繼也中柱留其尤輕者餘悉罷之以老乞休歸士民構遺愛祠祀焉中柱少以詩名旣爲部郎與朱彝尊查慎行輩相倡和生平獎掖後進匡振困乏時論稱之

道光志

季愈字退如父爲掾吏湖西奸民劉某謀不軌令窮治其黨愈父搜其家有一册皆素知其名無不法狀勢不

敢匿渡湖佯失足墮水以册納汗泥中皆獲免愈中康熙二十三年舉人三十九年進士皆第二殿試亦第二人以爲陰德所致授編修升庶子督學廣東道卒官翰林日聖祖賜御書一幅其裔孫世守謹藏於家

道光志

王式丹字方若號樓村凝鼎子少負重名年二十八始補弟子員旋選拔入成均時江南才士以詩名者有五子之目商邱宋公巡撫江南品丹爲第一康熙四十二年會試殿試皆第一時仁廟方南巡錄至問會元何如人商邱宋公平湖高公交譽之返蹕仁廟獨取會元卷閱之大獎曰以此作狀頭天下人當服否授職修撰

命纂修皇輿圖表佩文韻府一統志朱子全書淵鑿類函及分校廿一史諸書無不以精覈見賞賜疊厚尋以科臣王令儀奏劾丹座師選司陳公丹義不背陳大忤樞要卒以罷歸僑邗上會同年趙晉以科場事繫郡獄丹遭誣染幾不測事定踰年以疾卒查悔餘彙其詩爲樓郵集子懋謀字鶴聞康熙五十年舉人性仁愿工書著有岸秋堂集姪懋納字懿誦號抑夫康熙二十八年舉人官烏程知縣有亮績著有聊存稿

劉師恕字秘書號艾堂康熙三十九年進士由檢討考取御史與修三朝國史康熙字典政治典訓諸書典試

廣西五十二年督學河南旋歷中允祭酒雍正初出爲貴州布政使時有奏請丈量田畝升科者部檄到師恕謂苗疆邊地一經清丈必致驚擾俟有田土告爭者飭流土各官因事丈量事遂寢四年內陞通政使世宗詢貴州將弁可勝提督任者師恕以總兵蔡成貴對時蔡方密劾師恕乃力薦之尋署吏部左侍郎補右副都御史主試順天轉禮工二部協理直隸總督永定河決不俟奏聞卽飭藩司發帑賑濟並飭州縣不拘何項錢糧先行動用督標各營兵餉例俟部撥值歲暮師恕奏請將存司庫項借給後遂爲成法莊頭人凌虐良民俱案

名奏請擒治尋以內閣學士出爲福建觀風整俗使沿海姦民貪臺地肥饒往往包攬偷渡名曰客頭人各醵金行至海中多遇害師恕請定包攬者罪擬軍此風漸息臺灣逼近諸番有大甲西社番衆作亂號召沙轆牛罵樸枳籬等相犄角勢甚猖獗時提鎮領兵三千師恕請益兵三千接應番衆悉平羅源古田因米價昂貴飢民攘奪爲患兩院欲以上聞師恕曰此愚民耳急則恐有他變某請撫之至縣擒爲首者數人衆皆戢服以疾告歸會淮揚大水饑民求賑以從弟某連累部議革職乾隆二十七年恭迎高宗南巡予侍讀學士銜休致卒

年七十九

道光志

王懋茲字予中康熙五十七年進士充教習期滿當授縣令以母老求教職選安慶府教授雍正元年特召入都擢編修入直尙書房二年充鄉試同考官旋以母憂歸朝命治喪畢卽來京懋茲以老病辭得終喪尋乞休懋茲有志洛閩之學每從闇修作工夫絕不自表襮而窮經論史壹折衷於朱子官教授時凡呈牘概卻不受郡丞委監兌漕米以非職事所繫辭焉葺培元書院日與諸生講學以皖地士習卑曾寄書家人曰頃見潛山一名士其奔走逢迎乃有甚於下江諸君者前輩云一

號爲文人無足觀矣近日但一號爲名士則其人斷無足取蓋有爲而發也懋茲教諸生謂空言全不濟事亦不必深求只反之身心真實體驗於日用尋常行事處仔細檢點不一毫放過久之自然得力諸生聞之多踴躍奮起者又嘗謂講朱子之學在讀朱子之書而語錄之龐雜文集之訛誤尙不能盡辨何以發明尊德性道問學之全功於是盡取文集語類兩書審其文勢義理引證而區別之作爲年譜四卷考異四卷文集注語錄注若干卷又著有白田存稿等書年七十四卒入祀鄉賢祠當時同被召者喬崇修字介夫歲貢生侍讀萊子

與懋茲以道學相切劘交最善工分書官銅陵縣教諭

道光志

朱澤灃字湘淘號止泉諸生少有經世志凡天文算數河渠關於政治民生者博覽遐稽鑿然有裨於實用後見性理大全乃篤嗜宋儒之學一以朱子爲宗於朱陸學派異同辨晰尤精而涵養莊敬隨時體認已發未發實理流行平居端肅如對神明雍正六年詔大臣舉賢良同里劉師恕總督直隸具書幣以請擬疏薦澤灃反幣致書卒不就年六十有七所著書多發明朱子一家之學有朱子聖學考略誨人篇及止泉文集等書澤灃

門人喬漢字星渚號省齋性孝友敦尚氣節與人交重然諾里中疾病死喪多倚賴之邑大水子嬰堤驟決漢倡率捍塞穀數十頃皆獲保全年近五十始折節向學體薛文清讀書錄知一字行一字知一句行一句數語痛自刻勵有所疑必相質辨澤澤亟稱之曰從吾遊者衆異日仔肩斯道者漢也漢每事必嚴天人理欲義利公私之辨題其堂曰困學至老不懈乾隆元年舉孝廉方正固辭不就所著有日省錄訓子要言祖邁著喬氏家訓未卒業漢賡續成之澤澤子光進字宗洛諸生能傳其父學嘗於齋中懸朱子像曰庶此心有所收歛性

至孝居母喪以哀毀卒光緒十二年旌表孝子

道光志儒林事略

陳大復字敦來號玉盟乾隆七年進士授禮部主事陞員外郎郎中擢御史巡視中城傅文忠恆家人酗酒滋事擒治之公卿中爲之緩頰不聽翼日文忠投刺謝時兩賢之出爲河南陝汝道裁一切陋規以年老致仕授徒自給年八十餘卒子鴻副貢孫肇騏舉人肇鼇舉人

邵陽知縣

道光志

張肱字佐周號良亭父某以天文生爲欽天監博士世習天文遂占籍順天肱少補順天廩生後仍以天文生補官博士歷五官司書夏官正垂四十年陞戶部主事

肱在監於歷算諸書悉心考稽窮極幽渺時總理欽天
監事者爲張尙書照何侍郎國宗兩人皆敏覈非常他
人繕稿者必覆算再四始發肱呈稿曰君必無誤不覆
審也性至孝父性下急有同里赴公車者言某處餅甚
佳時肱已爲博士命往市閱數里往返則餅已冷父甚
怒撻之肱自若請復市乃借鄰馬馳取之父怒始解晚
歲罷官歸原里遁迹東郊數十里外不入城市逾年卒

道光志

王希伊字耕伯懋茲孫乾隆六年舉人選陝西白水縣
知縣縣共轄十六里里各十甲舊時里甲糧數多寡不

均里長因緣爲奸希伊爲截長補短東南畫八里西北
畫八里里分十甲甲分戶口四等田是甲均則里均里
均則糧均民便之裁革里差等陋規創建彭衙書院與
諸生講業一以朱子語錄及陸稼書松陽講義爲主著
有彭衙存稿載讀四書章句集註例四書例皆其所疏
通證明者並石刻御製訓飭士子文朱子白鹿洞教條
及選刻文編行編各七種又仿毘陵錢氏同善會例捐
俸爲一邑倡爲邑民王太宣妻賈氏趙九賢妻張氏澄
城張居妻韋氏立碑於墓以表節烈過富平謁揚斛山
墓懸匾於祠曰忠孝傳芳續修白水縣志遇旱禱輒應

在任六年以不喜簿書請改教職選青浦縣教諭陝人於彭衙書院之左建祠設位朔望瞻拜後去青浦時士人亦爲位於青溪書院並生祀之嘉慶七年入祀白水名宦邑中合請崇祀鄉賢

道光志

劉世譽字仿魏號蓼野永澄五世孫弱冠補府學生卽具牒請督學祀永澄於無錫道南祠道南祠者顧端文公憲成高忠憲公攀龍立以祀楊龜山者所謂東林書院是也先配享止羅仲素等七人其後顧高次第合食惟永澄未與至是督學如所請檄行後選靖江訓導值海水逆上學田盡沒自捐俸以給諸生膏火歲饑勘荆

溪戶口所餐惟糗糲或饋二雞子亦不食旋乞歸生平篤孝學問以朱子爲宗嘉慶元年舉孝廉方正辭不就年七十七卒子台拱台斗別有傳

道光志

王嵩高字少林號海山乾隆二十八年進士授湖北利川縣知縣甲午鄉試同考官居官仁恕勤政愛民利川有告女兒被殺者無鄰右可推獨遺一三歲兒嵩高攜至署以刀作殺人狀示之曰誰爲此者兒曰舅也乃卽捕告者一鞠具伏苗民爭山界前令屢勘不決嵩高循行叢薄間指一處曰此當有異掘之果得界碑案遂定待士有體諸生有爭訟者以理論遣不輕扑責而市并

無賴則痛以法繩之嘗謁大學士阿文成公問曰湖廣民風刁悍號爲難治信乎對曰吏實不良民則何罪阿公太息曰吾乃今得聞長者言以獲鄰境劇盜功補武黃同知署鄖陽施南知府後轉天津府同知調河西務所轄爲漕輓要道嵩高率吏卒晝夜護防終任無橫決之害陞平樂府知府將赴粵會母李病篤遂陳情歸嵩高孝友肫篤至老不衰幼孤賴世父箴與教養歲時哀思數十年如一日母病忌食鹽遂淡食終身母服闋有勸起復者曰老母已終吾得以餘年守先人墳墓足矣主講安定書院及樂儀書院喜獎掖後進多所成就爲

文敏贍操管千言詩軸尤富未手訂卒子嘉生校刊

道光

劉台拱字端臨號江嶺性至孝六歲母朱歿哀毀如成人
事繼母鍾與因母同弱不好戲入塾終日危坐九歲作顏子贊心慕理學設宋五子位朝夕禮之時有小朱子之目年十六補縣學生弱冠中乾隆辛卯舉人累試禮部未售朱文正珪深惜之台拱所交游則朱學士筠戴庶常震邵學士晉涵任御史大椿等居今稽古凡天文律呂書數聲韻等學靡不貫洽而尤精於三禮授丹徒縣訓導進見諸生以廉恥氣節相敦勉暇則誦說古

訓口授指畫嘗以朱子纂儀禮經傳通解卽孔門執禮之教取禮經十七篇繪爲圖與諸生習禮容發明先王制作精意歲饑大吏委以賑事乃親歷窮鄉胥吏無侵削潤人至今感之好藏書及金石文字生平廉介自守束脩外不名一錢當道有餽問絕不受齏鹽淡泊晏如也台拱爲學於名物義理由本賅末未嘗雜而二之傳注中有未確者雖經師故訓不爲苟同著有論語補注一卷漢學拾遺荀子補注各一卷三禮詩書並有纂著卒與父世暮同祀鄉賢子源岷字巨源號雪棧少穎悟能讀父書辨駁箋註考訂鐘鼎彝器極具卓議所爲古

文辭灑灑千言詩亦清逸秀拔卒年甫十七著有七略

齋詩集

道光志儒林
文苑事略

朱彬字武曹號郁甫姿稟純粹至性過人年十一喪母哀如成人幼穎異與外兄劉端臨台拱齊名從事經傳訓詁聲音文字之學江都汪容甫中嘗謂治經者固多文章則世無作者故彬於文用力尤深丁父憂斂葬盡禮三年疏食居外乾隆六十年舉京兆試子士彥士達旣貴彬皆嘗就養口不言公事聞鞭笞之聲則不樂士彥視學三省每誡以衡文不可稍有屈抑家居不干有司徒行宴坐與親朋處如常時家貲僅足自給而周卹

族姍不少怠道光十一年水災彬爲醫使諸孫分食饑人建議捐賑彬先爲倡督撫上其事議叙如令族有孤子養而教之卒得成立性方正人不敢干以私或面折人過然能改則收之故人憚其嚴而信其無他也自少至老好學不厭一言之善書而藏之凡手寫書數百卷丹黃者不下千卷林文忠稱其年益高學益邃心亦益虛以子貴封官至吏部尙書卒年八十二

道光志

劉台斗字建臨號星槎台拱弟學有師承尤究心於水利凡治河得失漕輸利弊無不洞悉源流中嘉慶四年進士授工部營繕司主事丁艱家居服闋大吏奏留南

河協塞王營減壩工竣議叙以同知用旋署江西吳城同知多善政補瑞州府銅鼓營同知以病乞歸尋卒台斗性孝友意氣慷慨遇事不退縮里居日如建書院修節烈祠浚宋涇河築劉家潭隄皆身先之在官平歛商兄弟之訟表前明士人葉景恩死難之烈至今人猶稱道弗衰瀕行吳城民持鏡一水盂一拜舟前曰象公明且清相泣別去其清操感人如此弟台垣字宿臨亦以

孝謹稱

道光志

劉彥矩字稚常號芷裳永沁弟孫幼孤貧秉母徐訓雖蓴粥不充而晝夜讀書不輟旣通籍費文恪公淳爲題

錫命酬貞額以旌其母彥矩弱不好弄而頭角已露長益攻苦於史漢詩古文辭靡不研究尤精舉子業登嘉慶己巳進士官國子監學錄居官勤慎爲勸學篇示諸生諸生成勵於學或以爲迂彥矩曰此吾世官豈敢曠職蓋彥矩先世永澄中柱俱官太學也時祭酒李宗昉特重彥矩文每見所校正必擊節嘆賞升博士瀕轉部階邁疾卒彥矩始終勤學已服官猶日手編帙博綜羣書性節儉馭家人嚴而接物又極溫裕其教人宛曲微不至必罄其誠都人士請業問奇者穀相擊也及卒時論

惜之

道光志

朱士彥字休承號詠齋幼穎悟博涉強記年十五入泮第一歲科試輒冠軍胡文恪高望視學時集高材生十人號揚州十秀才士彥與焉登嘉慶壬戌進士以第三人授編修歷宮坊講讀學士等官升少詹事入尙書房授惠親王讀二十五年擢內閣學士兼禮部侍郎仁宗升遐扶掖惠邸至闕號慟宣宗召見奉溫諭士彥卽上孫文定公三習一弊原疏及宋蘇文忠公奏議恭頌仁宗遺念數事道光二年遷兵部右侍郎轉左四年高堰決條陳河工五事一高堰石工宜估修一高堰二隄宜培補一五壩宜相機啓放一黃河宜兩岸分洩不得偏

於南岸一黃河下游隄薄處宜亟查勘所疏指河吏皆奏舉行旋陞左都御史擢工部尙書充經筵講官十一年查辦南河漫決情形勘被水災區又奉廷寄審理江安二省各案還奏請改黃河略曰黃河淤墊惟有將桃源以下改北隄爲南隄另築北隄讓淮水出清口刷沙至安東界會黃由舊河入海更於北岸開運河數十里約需銀二百餘萬兩可免倒塘灌運之弊且淮水東注計可高黃數尺得匯黃入海亦可紓淮揚水患議未及行十三年晉吏部尙書丁父艱服闋補原官復奉命往廣東江西浙江審各訟案遂至河南讞獄因條奏倉穀事宜略曰常平倉原利民良法穀貴則平糶賤則買補乃今豫省行事實有應更改者如民人赴倉納穀不給脚價則借資民力矣時價與例價未平不將糶價贏餘津貼則賣者虧價矣不赴鄰境及市集但令本地鄉保勸諭名爲勸賣未必不出於勒派查動用倉穀如囚糧一項價止五錢請卽照定價按年作正開銷毋庸動支倉穀必市價過昂民間艱食方准照例減糶動用既少則採買自稀以紓民力而祛宿弊士彥累持使節年已六十餘嘗曰身乃國家之身豈吾身耶或已臥復起視事至是奉使年餘蒙犯霧露所歷幾二萬里心力益瘁

比還遂病十八年秋卒於任年六十八贈太子太保諭
賜祭葬諡文定士彥一生推誠務實立朝清介不瞻狗
亦不刻覈有所保薦身受者亦莫之知凡三總禮闈歷
河南主考湖北浙江安徽學政屢充殿試讀卷官靡不
虛心校閱人莫敢干以私居家孝友篤於宗戚自奉甚
薄口不言貧然邑有興作如勸賑濟修城垣皆出資首
倡並親爲程督咸有成功所著有詩文集道光志
朱士達字公孚號恕齋嘉慶丁卯舉人丁丑進士安徽
黟縣南陵霍山懷甯等縣知縣任霍山建文峯塔修奎
文書院縣試拔吳廷棟卒爲理學名儒賑災懷甯存活

十數萬人升壽州知州壽俗強悍殺人者或以利啗貧
人代士達研審卒得真兇捐建考棚設里鄮義學增書
院膏火開濬芍陂斗門三百餘所得溉田六千餘頃升
鳳穎捕盜同知時徐宿爭水利涉訟士達於課士時詢
老諸生得河故道請復之兩境悉蒙其利爭遂息擢鳳
陽府知府署廬鳳道合肥土棍李二容攷凶暴不法士
達置之法強暴斂迹鳳陽舊轄泗州大河鳳陽三衛賦
稅視民糧爲重旗丁勾連奸役凡軍冊籍內有與民籍
同姓名者卽指爲衛籍簽作旗丁謂之飛軍民受擾累
士達發舊冊令所轄州縣各繕二部一存署一存公所

宿弊盡革調署徽甯池太廣道升廣西左江道丁父艱服闋授雲南迤東道尋甸楊林河受馬龍河水每盛漲輒溢土達於下流鑿靈心河七百丈去積石一百五十餘丈是歲山水發賴河宣洩民田得免水潦開化府童白寨有獯民以拒捕殺縣丞督撫委土達統兵往勦士達親詣其寨曉諭獯民咸畏縛送渠魁良民安業如故宗師縣有拜香會匪據山村收過客私稅士達緝捕盜賊俱獲升四川按察使調陝西按察使擢湖北布政使值崇陽軍務之後庫銀僅存五萬兩士達悉心綜核任滿時庫存銀七十萬兩以老疾致仕歸年七十九卒於

家祀鄉賢及壽州名宦著有知足知不足齋詩文集弟士廉道光癸巳進士官直隸武強山西石樓河南固始等縣知縣卓異升用同知有惠績子念祖字集之陝西佛坪廳撫民同知鄜州乾州直隸州知州佛坪多山崎嶇險阻念祖捐廉開鑿山徑便行旅廳設嘉慶間無學校念祖爲請奏設學額八名於疑獄多所平反有鐵匠婦謀殺夫誑其長子同謀匠遇害時二幼子在側事發將連坐念祖赦之任乾州巨豪某好結納官府欺壓鄉曲念祖絕不與通適其家火救滅之豪懷金來謝念祖嚴斥之以父憂歸時賊烽熾安徽巡撫福濟奏調皖營

委辦盱天團練念祖自往捐辦鎗炮簡練巡緝兩邑獲安和含糊匪起衆號十數萬實皆饑民當事者邀功恣殺念祖言大府寓撫於勦多所保全邑值南北兵燹難民紛沓良莠雜處念祖商邑宰行保甲清查法其良者給絮衣錢米故邑屢瀕於危卒無恙道光十九年黃河南注邑西鄉劉家圩將潰念祖毅然往妻高氏質簪珥衣服助之晝夜巡視圩賴獨全田數千畝獲豐收焉同治四年引見出都卒山東道中

成誠全字立人號雲鶴康保曾孫恩貢生候選教諭累封至中議大夫太常寺少卿誠全八歲能屬文世父原

大奇之與從兄仁全齊名時有二難之目年十五補弟子員從烏程胡文端觀遊以道德相敦勉性至孝偕叔兄以脩脯佐甘旨年十六遭父喪哀毀骨立奉母劉孝養備至母卒誠全齒耆艾孺慕如喪父時與人處一以至誠無疾言厲色莫年率宗族興修祠宇祀事惟謹以勤儉敬慎訓子孫子觀宣入翰林誠全貽書以謹逋貸爲戒及遷監察御史則勛以建白務裨國計民生勿搏擊樹威躁妄沽直視學西江又勉以盡心校閱去僞存眞毋徇私任性士苴士子觀宣所至謹於其職皆誠全教也同邑喬守敬稱其淵懿醇壹允爲淮海完人子觀

宣字子旬號紫筠道光丙戌進士授編修升監察御史戶科給事中陝西浙江主考轉太常寺少卿江西學政觀宣承誠全學溫厚寡言平居接物未嘗加詞色見者皆愛敬之其列諫垣彈劾一秉至公視學西江所獲若勞崇光祁宿藻石贊清吳可讀馮培元等皆知名士父誠全就養南昌卒觀宣哀毀盡禮與弟觀賓友于尤篤久分爨復以田宅讓之族之貧寒尤賴賙濟云

劉寶楠字楚楨號念樓道光乙未進士歷任文安元氏三河知縣寶楠天性竺摯父歿京邸甫五歲母喬茹苦督教能先意承志居喪守禮盡哀官文安審結積案千

四百有奇倡築隄堰堵塞演馬莊隄工決口在縣三年皆獲有秋署寶坻將受代值水潦籲請振濟然後行官元氏捐俸設廠捕蝗得不爲災官三河東三省兵凱徹過境以民價雇車應役民以無擾寶楠所學純明樸茂從事漢學不蹈詆娒宋儒之習嘗釐定揚州八屬名宦祠又議修建寶應祀典祀先正及鄉先生多見施行五世祖繼善拚關集七世祖心學四朝大政錄父履恂秋槎雜記及詩集皆手輯彙行又彙錄先德同宗詩文爲清芬集鄉先達著述亦哀錄數百卷著有論語正義釋穀寶應圖經等書

成孺原名蓉鏡字芙圃晚號心巢諸生生有至性年四歲家祭趨跽拜跪如成人五齡入小學通孝經大義父疾衣不解帶者期年及歿擗踊哀泣三日不絕聲氣絕而復屬者再授經養母扶持左右必躬必親母所欲百計致之忘力與財歲祿家人或不時食而奉母不少損又懼傷母心輒戒家人夏槃盂於堂若會食然以未忍一日去母側遂絕科舉不與省試母苦癩寒夜尤劇孺屏息牖戶外廉其衰數而調劑之或至申且咸豐中邑有寇警奉母避北村徒步從肩輿行盛暑烈日中數十里無所後先既曾國藩聘校書金陵書局舍母江甯有

己則治宋學眞儒也治漢學亦眞儒爲人則治漢學僞
儒也治宋學亦僞儒又曰學有三宗義理孔子所謂識
大也考證孔子所謂識小也詞章則發明斯二者者也
皆道之所在也然不可無本末輕重之差故孟子曰知
者無不知也當務之爲急又嘗爲楹帖云求是卽通儒
爲義理爲訓詁爲典章門戶何分漢宋希賢無異道曰
周程曰張邵曰朱陸躬修不外倫常與門弟子論學亦
以主敬窮理爲宗又隨其材器而牖之不囿於一格湖
南學使朱道然延主長沙校經堂儒立學程設博文約
禮兩齋湘中士人爭自興學世尤則之氣專容寂終日

危坐巖然若槁木之枝及與之親則溫且恭人人得其
欲以去處鄉黨宗族間勤禮而務施憂樂之如一體口
不道人過下至兒童走卒唯恐有傷而是非不阿亦無
敢以非義干者卒之日無戚疏賢不肖若喪其所依所
交多海內之望然絕遠聲譽每人士會集議論蠡起孺
獨淵默不一語有詢其所業者斂手謝不敏見者不知
爲名儒豐約得喪雖不一措意而國是善敗民生利病
則拳拳不能已一水旱一兵革之故至廢寢饋隱居著
述若友生燕語每以正人心厚風俗爲亟體用一源粹
然有得於斯道不爲風會所奪著書數十種義理則有

太極衍義一卷折周朱異同之故而得其衷我師錄一卷二千許年派別緒分主於一善紫陽學則二卷必自錄二卷庸德錄二卷心巢困勉記一卷論語論仁釋一卷明明德解義一卷校經堂學程一卷一以朱子爲宗下學上達體用兼備東山政教錄三卷取魯論論政者條舉件繫斷以後儒之說與當時之宜清儒學案目錄一卷學案備忘錄一卷國朝師儒論略一卷詳識有清一代學術升降與其次第傳授之緒又語錄若干卷考證則有尙書曆譜二卷以殷曆校殷周曆校周從違以經爲斷春秋日南至譜一卷太初曆譜一卷博通三統

下逮時憲諸術五經算術補注二卷步算釋例六卷申中抑西不阿世好禹貢班義述三卷據孟堅地志解禹貢於古今文之同異及鄭注與班偶殊者一一辨證卽有不合亦不曲護詩聲類表一卷切韻表五卷等韻之學能通江戴段王益之邃密切韻表爲二百有六表分二呼而經以四等緯以三十六母審辨音聲不容出入經史駢枝若干卷單辭片義稿有心得詞章則有文錄九卷蚤宗昌黎晚法廬陵沛乎煥乎載道之作詩錄一卷得淵明之超有子美之深又唐詩可興集六集寶應儒林文苑事略各一卷成氏先德傳一卷書法融會顏

柳適勁有度光緒九年卒年六十八國史省志均有儒林專傳子肇鑾諡恭恪別有傳門弟子甚衆多知名士同邑姚江潘詠曲阜孔廣牧金壇馮煦其尤著者均有著述傳其學姚江字子立增廣生生平不喜漢學而雅好利濟不以家貧自阻年十八卽潛心宋儒性理及先正格言其學以躬行實踐爲宗謂聖人非有異於人特不歉乎人之量爲人所不能及耳又謂人而不誠則事皆無實如水無源木無根反躬省察當如鏡之照如燈之燭絲毫不容瞞過又謂謝上蔡云克己須從性偏難克處克去然必尋其病根所在乃有可著力處又謂心

有所悟書之自省以期前進若言而不行恥孰大焉因自署編首曰顧言錄年甫三十遽歿

劉恭冕字叔俛號勉齋光緒五年舉人天性篤摯丁親憂盡哀盡禮處兄弟間怡怡愛敬接人以誠無疾言厲色幼承祖若考之學博涉通經父寶楠著述多未卒業恭冕總理之乃克成編講學實事求是雖學宗漢氏然不訾短宋儒安徽學政朱久香延校試卷識拔多根氏士讎校李次白春秋賈服注輯叅補百數十事先後主江南書局經心書院崇尚樸學成就者衆幼習毛詩晚年治公羊春秋發明新周之義闢何劭公謬說先後修

沔陽潛江黃岡應山等州縣志沔陽州泐革攷尤考據
精博湖北修通志以總纂相誣諉固辭僅任編輯之役
甫成泐革表尋卒撰著有何休論語註訓述廣經室文
鈔廣經室雜記同時朱百度字權之少攻苦以著書承
歡爲樂父疾扶持寢食不離及卒哀慟不欲生母勸以
義始進粥糜母病及歿如喪父時晨詣木主侍立出入
告十餘年如一日精治目施貧民藥餌受惠者衆著有
說文徵經漢碑徵經等書

王凱泰字幼軒號補帆原名敦敏幼有神童目年十五
爲縣學生道光二十六年順天舉人三十年會試第二

改庶吉士授編修咸豐九年充會試同考官是科一甲
二名進士孫念祖所得士也丁母艱彭文敬奏辦本籍
團練凱泰增勇丁額汰羸弱杜侵漁嚴其賞罰後捻寇
突至力卻獲全合肥李文忠撫蘇調治營務兼筦釐捐
事得規復蘇嘉湖各境署浙江糧儲道授按察使濬三
江開洩山陰會稽蕭山三縣之水以紓民困遷廣東布
政使裁鹽米陋規清州縣積累罷差徭丈沙田濬城中
六脈渠改建應元書院遷福建巡撫勸民息訟止鬪禁
火葬戒溺女禁迎神賽會仿粵東學海堂創致用堂課
士經學監臨福建鄉試部勒嚴明宿弊以絕任滿入都

臺灣事起廷議以臺灣孤郡懸海外欲移福建巡撫駐其地凱泰疏請先行履勘親冒暑瘴於開山撫番徵兵籌餉諸事殫盡心力積勞疾作以整頓臺地并巡撫兼顧省臺大局事宜疏告乃內渡至省垣旋卒詔贈太子少保銜賜卹予諡文勤身後蕭然同寮飲助以歸其喪入祀福建名宦祠所著有詩文集奏議若干卷

朱士端字銓甫道光辛巳舉人考充右翼宗學教習選廣德州訓導父毓楷字幼則九歲喪父事母盡養著有讀書解義於曾子十篇及許鄭朱子之學研究甚力士端精於許氏形聲之學嘗以二徐本互校多正後儒刪

改之失又以鍾鼎彝器諸文考今許氏所載古籀各體並精鑿不磨官廣德州清廉自矢教士有方歸里鍵戶著書窮年乞乞所已刊行者彊識編說文校定本宜祿堂收藏金石記吉金樂石山房文集詩集共若干卷從弟鼎字澄齋副貢生父元英以名諸生篤行孝友負邑聞望鼎家貧力學課徒養親少受業於士端通聲音訓詁之學聚書數千卷日勤鉛槧晚歲精研性理不囿漢宋門戶之見好施與邑有大役恆傾囊以振不少吝著有讀書類聚澄齋日記三益堂詩文稿

朱百遂字適庵士恭子幼好學能文章初官戶部郎中

中同治癸酉科舉人次年成進士改翰林院編修充武英殿功臣館總纂國史館提調光緒丙戌會試同考官直隸總督陳夔龍輩所得士也甲午授山西汾州府知府聽斷精敏訟者感化每相讓流涕去有號義河界介休孝義間兩縣以事爭且百年百遂立判曲直罷其訟著聲遠邇暇卽從事觚翰徵文乞書者踵相接任久以病將乞歸值拳匪亂地方日岌力疾籌畫以劇勞卒於官年五十九歸喪之日送者萬人貧民持布繖香楮從數十里相泣去百遂於學無不窺畢生未一日釋卷篤嗜性理以體行爲指歸入都從倭文端仁遊學益進終

寶應縣志 卷十一 列傳 三二 人物志

其身從政治家不踰禮法敦孝友與人以誠尤好爲善京師廣仁堂敬節會皆所創立至晉復值荒歉盡力謀振不足以俸繼之歸喪日無餘資同官舊遊多貴顯百遂孤直不甘蚤乞爲權貴畏嫉沈淪閒署二十餘年出守復坐是不得遷進齋志以歿時論惜之著有息庵詩文稿國史館一傳稿

成肇慶字漱泉父孺別有傳肇慶同治癸酉舉人光緒六年大挑知縣父不欲其遽官遂就金陵書局分校旋主講徐州書院迭丁父母艱服終後調赴直隸奉檄振山西饑查放戶口必親不假手胥吏多所全活十七年

叙籌振功加同知銜十八年總督李鴻章檄辦熱河教匪善後撫恤氓庶備至都統嘉異之議彙奏補建昌力辭不就旋保補缺後以直隸州用十九年署滄州知州二十二年署靜海縣勤政愛民百廢具舉期滿去任百姓攀轅泣送數十里二十五年補靈壽縣縣固僻遠多盜賊肇孽誅破姦猾殄其支黨然後興學校養生徒潔己修禮志行之士莫不宗之未數月風教大洽二十六
年拳匪變起聯軍入京師縱兵旁掠延及靈壽責供牲畜糧芻甚厲肇孽壹不應又自念義不受辱作絕命詩見志中有屈己全民命捐軀表素懷之語卽於二十七

年三月初一日投井死將死時自繕遺牒附絕命詩閒道達府具言連日洋兵紛至西向力攻自係大局決裂若再接待供應是以臣子助攻君父私心何安守土之義避無可避勢處萬難祇有一死總督李鴻章據以入告疏稱洋兵入犯以來所過殘破各郡縣因先奉布政使廷雍檄飭禮待冀免驛騷臣不顯言峻斥者以非我族類所欲不遂必至焚殺相仍與其激怒之而肆彼凶殘不如優柔之而使之馴擾然而官民畏禍所至靡然反顏事仇四維垂盡此風俗人心之大可慮而臣獨居深念所憤鬱難解者也今成肇孽獨能伸此大義精忠

亮節昭若日星使天下後世知臣子效忠理當如此則
泰山之重與被迫戕生者不可同年語矣况彼族聯旆
長軀臣身在局中尙不敢謂要盟之可信成肇慶身居
僻壤見勢之不可止遏乃以一死報我朝廷苟非忠赤
性生安能從容若此臣既傷良吏云亡復慨世風日下
且欽且憫悼歎奚窮奏入諭曰直隸靈壽縣知縣成肇
慶恪守官箴夙懷忠憤本年二月間見大局阽危地方
蹂躪深維守土效忠之義勢處萬難誓以一死報國洵
屬從容就義大節凜然深堪褒尙著照知府例從優賜
卹並加恩予諡准於死事地方建立專祠宣付國史館

立傳以彰忠節尋贈太僕寺卿銜予諡恭恪賞雲騎尉
世職襲次完時以恩騎尉世襲罔替並廕一子入監以
知縣侯銓二十八年直隸總督袁世凱復疏請追贈布
政使陞銜照布政使例從優議卹並在直隸省城添建
專祠以示旌異奉旨著准其於直隸省城添建專祠二
十九年兩江總督魏光燾江蘇巡撫恩壽復循江蘇紳
民請於原籍捐建專祠春秋官爲致祭據以上聞兪旨
可之肇慶生而聰穎性沈毅少時負氣慷慨不輕假人
辭色然調貧濟乏急人之急又必竭智力爲之博綜六
藝世其父學能爲古文辭尤善倚聲書宗虞伯施孫過

庭晚學小篆得斯冰遺意深自韜晦恥末俗愚誣之失
著有唐五代詞選宋六十一家詞選彊恕堂文存漱泉
詞諸書年五十有五妾馮在里聞肇譽殉歐血死之旌
表烈婦子一靜生難廕知縣

劉啓彤字丹廷光緒壬午舉人丙戌進士以主事分兵
部職方司幼有四方之志北出塞遊和龍白狼間窮其
形勝還江督周馥筦權津海延教諸子從學者多掇巍
科蒐討兵農工商諸術尤邃於公法交涉商權兵政窮
極本末如宿吏丁亥春應詔遊英法諸國以鐵路爲泰
西要政薈譯其言成星輜考轍英法政概兩書己丑遊

印度暹越歸聞父喪哀毀成疾服闋赴津會辦海防支
應局癸巳春山西北邊大饑合肥李文忠奏命往賑徧
詣歸化諸城全活無算復修濬北運河鳳河諸工賑永
平遵化諸屬之饑母朱卒啓彤奔喪歸里毀痛嘔血年
四十有四卒從弟啓襄字少棠光緒丙戌科進士改庶
吉士負文名早卒啓端字正卿光緒己丑科進士改庶
吉士授編修辛卯湖北正主考甲午鄉會試同考官累
官至翰林院侍講性孝友文章爲世所稱

王敬則臨淮射陽人也母爲女巫嘗云敬則胞衣紫
色應得鳴鼓角聞者笑之兩腋下乳垂數寸恆夢騎

五色獅子性倜儻嘗與旣陽縣吏鬥曰我爲旣陽縣當鞭汝背吏唾曰汝爲旣陽縣吾爲司徒公矣屠狗商販好刀劍善拍張宋元徽初以技補刀戟左右遷俠穀隊主領細鎧左右轉旣陽縣令召葑門吏曰吾得旣陽縣矣汝何日爲司徒公耶厚過之時縣以軍荒山中踞有劫寇一部極爲民害敬則以計擒其渠帥閣部殲焉民大感說三年隨齊高帝破桂陽賊於新亭轉越騎校尉安成王車騎參軍時宋政日壞敬則遂歸誠齊高帝值楊玉夫之亂敬則馳奉高帝戎服排永明門入殿定策昇明元年晉輔國將軍領臨

淮太守知殿內宿衛兵事沈攸之事起進號冠軍將軍襲殺袁粲等竊發盡平敬則力也高帝受禪敬則將輿入宮啓譬順帝引令升輿曰出居別宮耳官先取司馬家亦如是也高帝卽位加都督南兗州刺史封尋陽郡公妻封尋陽國夫人二年改都官尙書遷吳興太守威令嚴明劫掠屏息路不拾遺境內以清過烏程市見屠肉枿曰吳興昔無此枿是我少時在此所作也召故人飲酒說平生不以屑意遷護軍以家爲府三年以改葬去職詔贈敬則母爲尋陽國太夫人改授侍中撫軍高帝遺詔敬則以本官領丹陽

尹尋遷會稽太守永明二年給鼓吹一部三年進號
征東將軍旋與王儉俱卽本號開府儀同三司儉曰
不意老子與韓非同傳敬則聞之曰我南沙縣吏竟
與王衛軍同日拜三公復何恨了無慍色朝士以此
多之十一年授司空時明帝輔政有廢立意仍出敬
則爲會稽太守兼都督海陵王立進太尉明帝卽位
拜大司馬帝性猜忌多殺害以敬則高武舊臣外示
優禮內實疑備數訪問其體幹食飲敬則懼會帝疾
以張瓌爲平東將軍敬則曰東有誰祇是我耳我亦
何易平我終不受金嬰嬰鳩酒也時偵邏日迫知必

不免遂發丁壯招集配衣聲言還朝聲勢甚盛至武
進陵口勸哭乘肩輿而過朝廷遣輔國將軍左興盛
直閣將軍胡松等率大兵迎拒遇於山陽敬則累戰
皆勝突胡松以奇兵出其後來擊之遂驚潰軍容袁
文曠陣斬敬則傳首京師朝廷漆其首藏武庫梁天
監元年其故吏夏侯亶表請收葬許之

志辨曰邑乘與家乘異小善必錄善

善從長也大惡亦必書所以示懲也邑南齊王敬則元惡大慙也石林志錄其本傳與臧陳等傳一體編入先於凡例發明其義識者韙之今志徑爲削去第節取其大略以入摭記意蓋予之且諱其逆節曰起兵語尤回護殆削之轉諱之乎夫敬則以一朝勳舊擁重鎮位三公極人臣之貴猥以一時疑忌不自斂抑輒舉亂兵躬爲叛首此春秋所必誅千古之大戒鄉里諱之青史能諱之耶若曰惡其人不欲存其名是史記不必記英彭而楚史不當名構杙矣圖經曰王敬則弒君於宋叛亂於齊例在不登亦不錄嘉慶惟揚志云敬則以臨淮射陽人居晉陵之南沙南齊書直曰晉陵南沙人從其實也南史曰臨淮射陽人本其籍也其實敬則

自生長江南非復晉之廣陵射陽人也案此說非也南齊時射陽始僑置江南敬則始仕宋前廢帝時射陽仍係故治敬則雖生長江南而籍從故縣縣志亦當載其不載者自以其叛臣黜之案圖經之言至允史傳並載善惡然郡縣人物志多專錄其善者今姑從康熙志例載志辨補傳附篇末以別之